

7 peratus penduduk Johor terdedah jangkitan difteria

B/HARIAN 26/2/19
ms 9

Johor Bahru: Sebanyak tujuh peratus daripada penduduk di negeri ini yang tidak mendapatkan suntikan vaksin imunisasi, berkemungkinan menjadi antara penyumbang penularan jangkitan difteria.

Pengerusi Jawatankuasa Kesihatan, Alam Sekitar dan Pertanian negeri, Dr Sahrudin Jamal, berkata statistik itu diperoleh berdasarkan capaian liputan atau pengeluaran suntikan vaksin imunisasi Jabatan Kesihatan negeri.

“Ini bermakna, 93 peratus sudah menerima suntikan vaksin imunisasi.

“Ada banyak sebab mereka tidak menerima suntikan vaksin ini, antaranya faktor keagamaan, semula jadi dan banyak lagi sebab membuatkan mereka enggan mendapatkan suntikan itu,” katanya ketika dihubungi, semalam.

Dr Sahrudin berkata, kewujudan kelompok antivaksin di Johor dapat dilihat sejak lima tahun lalu lagi.

“Sekarang kita lihat ia (tren) semakin bertambah, namun Jabatan Kesihatan sentiasa mendekati kumpulan ini dan memberi penerangan kepada mereka tentang pentingnya + suntikan vaksin imunisasi.

“Bagi kami pengamal perubatan, ia (suntikan vaksin imunisasi) sangat perlu. Jangan disebabkan seorang dua ibu bapa tidak mahu mendapatkan suntikan, ia menyebabkan kesusahan kepada yang lain,” katanya.

Tiada mangsa baharu

Dr Sahrudin juga mengesahkan tiada mangsa baharu yang positif difteria hasil saringan dan pemeriksaan dibuat Jabatan Kesihatan Johor.

Beliau berkata sehingga jam 3 petang semalam tiada mangsa baharu dikenal pasti susulan semua kanak-kanak yang dijangkiti difteria itu sudah dikuarantinkan.

“Semua lima kanak-kanak bawah empat tahun yang positif jangkitan difteria masih ditahan di wad pengasingan pediatrik Hospital Sultanah Aminah (HSA) untuk mendapatkan rawatan lanjut,” katanya.

Beliau berkata, pihaknya juga akan mengeluarkan satu kenyataan rasmi hari ini, berhubung perkembangan tiga daripada lima kanak-kanak positif jangkitan difteria yang dibenarkan pulang awal jika tiada sebarang simptom ditunjukkan mereka.

Kelmarin, BH melaporkan lima kanak-kanak disyaki positif jangkitan difteria hasil saringan terhadap 52 individu oleh Jabatan Kesihatan negeri dan ditahan sejak kelmarin di HSA.

Seorang daripada mangsa yang positif adalah kakak kepada budak lelaki berusia dua tahun satu bulan yang meninggal dunia disyaki akibat jangkitan difteria, Selasa lalu dan tidak pernah menerima suntikan imunisasi.